



# TRNOVO

**BILTEN OPĆINE TRNOVO** Besplatan primjerak • broj 10 • mart 2012.



***Kučuk Kadir***  
***I mjesto, Tehnika: kreda u boji***



***Kerim Kučuk***  
***II mjesto, Tehnika: ugljen, kreda u boji***



***Diad Šaćirović***  
***III mjesto, Tehnika: tempera***

**TAKMIČENJE UČENIKA OŠ „ZAIM KOLAR”**  
**DEJČIĆI U LIKOVNIM RADOVIMA**



17.mart  
Dan Općine Trnovo



22.mart  
Dan 1.Bošnjačke brigade

**PROGRAM OBILJEŽAVANJA**  
**17. MARTA - DANA OPĆINE TRNOVO**  
**I 22.MARTA DANA 1.BOŠNJAČKE BRIGADE**



Stupanjem na snagu Odluke o utvrđivanju Kalendara za obilježavanje značajnih događaja i datuma iz perioda odbrambeno - oslobodilačkog rata 1992-1995.godine na području Općine Trnovo, utvrđeno je da je Dan Općine Trnovo, 17.mart, Dan integracije Općine Trnovo.

Na osnovu člana 11. stav 2. Statuta Općine Trnovo ("Službene novine Kantona Sarajevo", broj: 12/08), Općinsko vijeće Trnovo na 22 sjednici održanoj 29.12.2010.godine, donijelo je Odluku o načinu obilježavanja Dana Općine Trnovo. Ovom Odlukom propisuje se način obilježavanja i određuju rokovi i nosioci aktivnosti na obilježavanju 17.marta, Dana Općine Trnovo

## **PROGRAM OBILJEŽAVANJA 17. MARTA - DANA OPĆINE TRNOVO I 22.MARTA DANA 1.BOŠNJAČKE BRIGADE**

**TAKMIČENJE UČENIKA OŠ "ZAIM KOLAR" DEJČIĆI U LIKOVNIM RADOVIMA  
(07.02.-02.03.2012.GOD);**

**UČENJE JASINA U SVIM DŽAMIJAMA POSLIJE DŽUMA NAMAZA  
(16.03.2012.GOD);**

**PRIJEM PORODICA BORAČKIH UDRUŽENJA KOD OPĆINSKOG NAČELNIKA I  
PREDSJEDAVALJUĆEG OPĆINSKOG VIJEĆA U 13:00 SATI  
(16.03.2012.GOD);**

**UČENJE JASINA NA SPOMEN OBILJEŽJU IGMAN U 11:00 SATI  
(17.03.2012.GOD);**

**OBRAĆANJE RATNOG KOMADANTA SELIMA HAMZIĆA U 11:30 SATI  
(17.03.2012.GOD);**

**SVEČANA SJEDNICA U 12:00 SATI  
(17.03.2012.GOD);**

**IZLOŽBA RATNIH FOTOGRAFIJA PROF. ŠEMSA TUCAKOVIĆA  
(16. - 18.03.2012.GOD);**

**POLAGANJE CVIJEĆA NA MEZARJU PRVOG PREDSJEDNIKA BIH ALIJE IZETBEGOVIĆA  
22.03.2012. GOD U 13:00 SATI;**



**17.mart  
Dan Općine Trnovo**



**22.mart  
Dan 1.Bošnjačke brigade**



## KAPITALNI PROJEKTI U 2011.GODINI

### Nastavak rekonstrukcije glavnih saobraćajnica i lokalnih puteva

Izvedeni radovi na dionici od Razina gaja do asfalta prema Trebečaju, finansijska sredstva obezbjeđena od Fonda za povratak BIH u iznosu od 88.600,84 KM, izvođač radova TB inženjering iz Breze.

Izvedeni radovi na dionici od Gaja do asfalta prema Brdima, finansijska sredstva obezbjeđena od Direkcije za ceste Kantona Sarajevo i Općine Trnovo u iznosu od 106.000,00 KM, izvođač GRAKOP Kiseljak.

Rekonstrukcija puta Garež – Delijaš. Izvedeni radovi na I dionici od Gareža, finansijska sredstva obezbjeđena od Federalne direkcije za ceste u iznosu od 150.000,00 KM. Izvedeni radovi na II dionici – nastavak asfaltiranja, finansijska sredstva obezbjeđena od Federalnog ministarstva prometa i komunikacija iz GSM licence u iznosu od 150.000,00 KM. Izvođač radova na obje dionice je BUCO MERC iz Kiseljaka.

Rekonstrukcija puta za Boljanoviće. U saradnji sa jedinicama OS BIH izvršena sanacija dijela puta sa posebnim osvrtnom na Riđan.

Nastavak asfaltiranja lokalnih puteva uz učešće građana. Potpisani ugovori sa Direkcijom za ceste za asfaltiranje lokalnih puteva uz učešće građana: Brutusi, Umčani, Slavljevići, Boljanovići i Ostojići. Radovi na asfaltiranju puta za Ostojiće završeni u planiranom obimu.

Izvršena sanacija puteva uz angažman jedinica OS BIH: Konik – Lukavac, Konik – Elezovići, Boljanovići, Pomenovići, Grab, Govedovići, Umoljani – Gradina, Milišići – Konik, Prokresa – Proskok – Krstac – Bare, Krstac – Obla Brda, Prečko polje – Prečani – Rahovići – Umčani, Krsmanići, Hamzići, Šišići, Bašci, Durakovići, Slavljevići, Mijanovići, Vrbovnik, Rakitnica, Pervisko groblje – Oziminsko groblje, Lukomir.

### Ljetno i zimsko održavanje puteva kontinuirano tokom cijele godine

Magistralni put M18 od Brane do Trnova i Garež – Delijaš – Grebak održava Federalna direkcija za ceste u periodu od 5 godina. Putni pravac Krupac – Babin do – Sinanovići i Gornja Grkarica – Pendičići održava Kantonalna direkcija za ceste.

Zajednički su obezbjeđena sredstva za zimsko održavanje lokalnih saobraćajnica u općini (Općina Trnovo i Direkcija za ceste Kantona Sarajevo).





## Rekonstrukcija visoko i nisko naponske mreže

Završena prva faza izgradnje visoko i niskonaponske mreže Prečani i Rahovići.

Završena planirana izgradnja visoko i niskonaponske mreže i trafostanice Lukavac i Kramari.

Završeno postavljanje UKB-a od Rijeke do Hamzića.

Završena izgradnja niskonaponske mreže Slavljevići (Rijeka - Govedovići).

Završena je izgradnja niskonaponske mreže Govedovići i Karovića - Đokanovića.

Izgrađena visoko i niskonaponska mreža za Brutuse.



## Izgradnja i održavanje javne rasvjete

Vršeno je održavanje javne rasvjete uz puno problema zbog nedostatka finansijskih sredstava koje je trebalo obezbjediti Ministarstvo prostornog uređenja i zaštite okoliša Kantona Sarajevo.

Izvršena sanacija rasvjete u Rakitnici i Ostojićima.



## Izgradnja spomen obilježja u Trnovu

Projekat zajednički finansiraju Općina Trnovo, Fond memorijala i Ministarstvo za boračka pitanja Kantona Sarajevo.

Obezbjeđena sredstva u iznosu od 39.000,00 KM.

## Izgradnja mosta u Karovićima (put Delijaš – Grebak)

Završena izgradnja mosta u Karovićima, sredstva obezbjeđena od strane Federalne Direkcije za ceste u iznosu od 350.000,00 KM, izvođač radova ŽGP Sarajevo.



## Izgradnja Doma kulture u Delijašu i Dejčićima

Započeti radovi na izgradnji Doma kulture u Delijašu i Dejčićima finansiran od strane OdRaz-a i Općine Trnovo.

Vrijednost radova iznosi 167.000,00 KM.

## Izgradnja vodovodnih sistema

- izgradnja vodovoda Čunčići

Finansijska sredstva obezbjeđena od strane Ministarstva prostornog uređenja i zaštite okoliša u iznosu od 17.831,26 KM, a završena je izgradnja kaptaze i polaganje dijela cjevovoda. Izvođač radova JKP Vareš.





- izgradnja rezervoara Šabanci, Vrela  
Završeni radovi na izgradnji rezervoara Šabanci. Sredstva obezbjeđena od Ministarstva prostornog uređenja i zaštite okoliša u iznosu od 13.662,23 KM. Izvođač radova AGI Konjic.

- izgradnja bunarica i uređenje korita u Lukavcu  
Započeti radovi na izgradnji bunarica i uređenja korita u Lukavcu. Finansijska sredstva obezbjeđena od Ministarstva prostornog uređenja i zaštite okoliša i Općine Trnovo u iznosu od 61.959,63 KM. Izvođač radova Harysco iz Sarajeva.

### Izvođenje radova na vanjskom uređenju Škole u Dejčićima

Pripremljen dio projekta na vanjskom uređenju i kandidovan prema REC-u i isti završen. Urađeno asfaltiranje sportske plohe, drenaža oko plohe i izvršena nabavka mobilijara za park.

### Sanacija klizišta

- klizište naselje Ozimine, završeni planirani radovi, u toku je monitoring klizišta. Sredstva obezbjeđena od strane Civilne zaštite Kantona Sarajevo u iznosu od 165.130,55 KM. Izvođač radova TB inženjering iz Breze;

- groblje Ozimine, završeni planirani radovi, u toku je monitoring klizišta. Sredstva obezbjeđena od strane Civilne zaštite Kantona Sarajevo u iznosu od 61.769,58 KM.

- izrada projekta klizišta kod azilantskog centra, Federalna Direkcija za ceste izradila je projekat i izvršila sanaciju.

- izrada projekta klizišta kod sela Hamzići, Federalna Direkcija za ceste izradila je projekat i izvršila sanaciju i obezbjedila sredstva u iznosu od 194.000,00 KM. Izvođač radova GRAKOP Kiseljak.

- izrada glavnog projekta na sanaciji lavinskog prostora Usoviti do I i II. Sredstva obezbjeđena od strane Civilne zaštite Kantona Sarajevo, projektant Geokonzalting Sarajevo. Vrijednost projekta 10.163,30 KM.

### Izrada planova parcelacije

Plan Parcelacije Ilovice je završen, usvojena Odluka o usvajanju i Odluka o provođenju plana.

### Izrada projektne dokumentacije

- projekat puta Garež – Delijaš, urađeno Idejno rješenje trase puta;





- projekat vodovoda Krsmanići, završen projekat
- projekat revitalizacije i uređenja naselja i drugi projekti od interesa za općinu – studija, urađeno zoniranje Tušila i prijedlog rješenja uređenja trga u Lukavcu
- projekat spomen obilježja, završen projekat


## Ostali projekti

- Obnova stambenih objekata – projekti finansirani od Ministarstva za ljudska prava i izbjeglice BiH. Izrađeno 9 stambenih objekata iz programa ZPO9, vrijednost projekta 150.000,00 KM.

- Izgradnja Azilantskog centra u Pomenovićima  
U toku radovi na uređenju infrastrukture u sklopu projekta Azilantskog centra.

- Nastavak uređenja biciklističkih staza i stavljanje u funkciju postojeće. SKI Klub Bjelašnica, Općina Trnovo, Hadžići, Ilidža i Direkcija za ceste Kantona Sarajevo potpisale su sporazum o finansiranju projekta obilježavanja biciklističkih staza na prostoru općina i njihovu promociju.

Od strane pokrajine Piemonte obezbjeđena su sredstva u iznosu od 140.000,00KM za nastavak radova na uređenju biciklističkih staza.



## Snimanje infrastrukturnih objekata

U toku 2011.godine izvršeno je geodetsko snimanje komunalnih uređaja kanalizacione mreže u dužini od 2352 m, geodetsko snimanje komunalnih uređaja Telekomunikacione mreže u dužini od 7777,11m, geodetsko snimanje elektromreže u dužini 9775m.

## EKOLOŠKI STANDARDI

### Izgradnja kanalizacionih sistema

Rakitnica – Šabići – Lukavac : Finansijska sredstva obezbjeđena od Ministarstva prostornog uređenja i zaštite okoliša u iznosu od 59.854,02 KM, a usmjerena su na nastavak radova na izgradnji kanalizacionog sistema. Planirani radovi završeni.

Pomeni – Baljića kamen: Projekat izgradnje kanalizacionog sistema završen u planiranom obimu, sredstva obezbjeđena od strane Ministarstva prostornog uređenja i zaštite okoliša u iznosu od 19.988,28 KM.

Hamzići: Finansijska sredstva obezbjeđena od Ministarstva prostornog uređenja i zaštite okoliša u iznosu od 15.000,00 KM, radovi završeni u planiranom obimu.

Šabanci – Dejčići – Omenik: Finansijska sredstva obezbjeđena od Ministarstva prostornog uređenja i zaštite okoliša u iznosu 29.998,36 KM. Radovi završeni u planiranom obimu.

## Uređenje korita rijeka

Uređenje korita rijeke Željeznice – sredstva obezbjeđena od strane Ministarstva privrede u iznosu od 69.987,59 KM.

Uređenje korita rijeke Rakitnice - sredstva obezbjeđena od strane Ministarstva privrede u iznosu od 79.817,40 KM.

Uređenje korita rijeke Željeznice – Sredstva obezbjeđena od strane Agencije za vodno područje Slivovi rijeke Save u iznosu od 80.000,00 KM.



## Afirmacija kulturno historijske i duhovne baštine općine

U cilju afirmacije kulturno historijske i duhovne baštine, nekropola stećaka u Umoljanima predložena je na listu UNESCO-a od strane Ministarstva civilnih poslova Bosne i Hercegovine. Ispred džamije u Umoljanima i nekropoli stećaka u Umoljanima, Šabićima, Ledićima i Gradini postavljena je tabla sa opisom nacionalnog spomenika BiH.

Za nekropolu stećaka Zlatarić bit će naknadno postavljena tabla.



## Posjeta selu Lukomir

Selo Lukomir je u zimskim mjesecima odvojeno od svijeta. Snježni nanosi viši od dva metra ovo selo čine nepristupačnim. Hranu i lijekove moguće je dostaviti jedino helikopterom ili motornim sankama.

Nakon što je nekoliko dana bila izgubljena telefonska komunikacija Haris Mizdrak, pripadnik IV Policijske uprave Ilidža-odjeljenje Trnovo organizovao je posjetu selu Lukomir kako bi se dostavila hrana i lijekovi za šest stalnih stanovnika ovog sela, koji provode zimu u ovom selu.

Pet članova porodice Masleša i jedna 80- godišnja nana žive od uzgoja ovaca na 1.500 metara nadmorske visine.





## AKTIVNOSTI OPĆINSKOG VIJEĆA TRNOVO U 2011.GODINI

Općinsko vijeće Trnovo u 2011. godini, u skladu sa Programom rada Općinskog vijeća, održalo je sedam redovnih, jednu svečanu i jednu tematsku sjednicu.

Dnevni red redovnih sjednica sadržavao je tačke planirane Programom, ali također su razmatrane i pojedine tačke za čijim razmatranjem je naknadno ukazana potreba i predlagač navedenih tačaka u najvećoj mjeri bio je Općinski načelnik. Svečana sjednica Općinskog vijeća Trnovo u povodu Dana općine i Dana 1.Bošnjačke brigade održana je 19.marta.

Tematska sjednica Općinskog vijeća Trnovo održana je 15.jula u hotelu Maršal na Bjelašnici na temu Bjelašnica - Perspektive i razvoj.

Na ovoj sjednici razmatrana je problematika daljeg razvoja Bjelašnice kao sportsko rekreativnog centra s posebnim akcentom na problem koji je izazvalo donošenje Odluke o utvrđivanju Igmana, Bjelašnice, Treskavice i kanjona Rakitnice (Visočica) područjem posebnih obilježja od značaja za Federaciju Bosne i Hercegovine i Odluke o pristupanju izradi prostornog plana područja posebnih obilježja od značaja za Federaciju Bosne i Hercegovine - Igman, Bjelašnica, Treskavica i kanjon rijeke Rakitnice (Visočica) za period od 2007. - 2027.godine. Pozitivni efekti ove sjednice vidljivi su u velikim ulaganjima na području Bjelašnice, a koja će se nastaviti i u narednom periodu uzimajući u obzir činjenicu da je ustavni sud Federacije Bosne i Hercegovine svojom presudom obustavio primjenu navedenih Odluka čime je otvoren put za daljnji razvoj Bjelašnice kao najvažnijeg sportsko rekreativnog centra u Kantonu Sarajevo i šire.

Od najvažnijih Odluka donesenih u 2011.godini po različitim oblastima ističemo:

### **Organi uprave**

Odluka o izmjenama i dopunama Odluke o osnivanju i djelokrugu Jedininstvenog općinskog organa uprave i posebnih stručnih službi Općine Trnovo za 2011.godinu

### **Prostorno uređenje**

Odluka o usvajanju Plana parcelacije Ilovice  
Odluka o provođenju Plana parcelacije Ilovice

### **Komunalni poslovi**

Odluka o povjeravanju dijela obavljanja komunalnih djelatnosti JKP Trnovo

### **Poljoprivreda**

Odluka o dodjeli sredstava za razvoj poljoprivrede na području Općine Trnovo u 2011.godini  
Odluka o prenosu na korištenje traktora sa priključcima ZON»Kooperant» Husremovac

### **Javna preduzeća**

Odluka o prenosu na trajno korištenje utovarivača - rovokopača Komatsu WB93S-5EO JKP Trnovo  
Odluka o prenosu na trajno korištenje vozila Ssangyong kombinovano pick-up actyon sport JKP Trnovo  
Odluka o prenosu na trajno korištenje vozila Škode Fabia Combi Classic 1,6 TDI CR JKP Trnovo





## USVOJEN BUDŽET ZA 2012.GODINU

Općinsko vijeće je na 31. sjedinici, održanoj 14.februara 2012.godine, usvojilo Budžet Općine Trnovo za 2012.godinu i odluku o njegovom izvršavanju.

Prvobitno je izrađen Nacrt budžeta za 2012.godinu, prihvaćen od strane Općinskog vijeća i upućen na javnu raspravu. Na zborovima građana, održanim u sve četiri mjesne zajednice iznesen je niz prijedloga, koji su se uglavnom odnosili na poboljšanje uslova življenja, odnosno na dodatna ulaganja u izgradnji infrastrukture. Svi prijedlozi su pribilježeni, naknadno razmotreni i u skladu sa prioritetima i mogućnostima finansiranja izvršeni u Budžet za 2012.godinu.

### BUDŽETSKI PRIHODI

Budžet za 2012. godinu planiran je u ukupnom iznosu 7.102.703,14 KM što je za 13% više u odnosu na planirani Budžet za 2011.godinu. U ukupnoj strukturi prihoda, prihodi od poreza iznose 263.800,00 KM ili 4% od ukupnih prihoda.

Neporeski prihodi Budžeta iznose 2.277.115,43 KM ili 32% od ukupnih prihoda. U 2012.godini je planirana i naplata od drugih nivoa vlasti, pa je u strukturi prihoda za tekuće potpore ili grantove planiran iznos od 4.561.687,71 KM ili 64% od ukupnih prihoda.

### PLANIRANI RASHODI I IZDACI

Ukupna Budžetska sredstva raspoređuju se na slijedeći način: na rashode i izdatke u ukupnom iznosu od 6.134.187,71 KM, budžetsku rezervu 35.000,00KM i na pokriće deficita iz prethodnih godina 933.515,43 KM.

Prilikom rasporeda budžetskih sredstava nastojalo se da se prati trenutno opće stanje u ekonomiji, koje je nažalost dovelo do smanjenja investicija, a ujedno i do nužnosti za povećanim zahtjevima za intervenisanje u osnovnim životnim potrebama naših građana. Na plaće i naknade troškova zaposlenih i općinskih vijećnika odnosi se 1.057.600,00 KM, a za doprinose na teret poslodavca 103.500,00KM sredstava iz Budžeta. Ukupni materijalni troškovi neophodni za funkcionisanje organa uprave i Općinskog vijeća planirani su u iznosu 340.000,00KM.

### KOMUNALNA INFRASTRUKTURA

Za investiciono-tehničko održavanje komunalne infrastrukture planiran je iznos od 1.196.964,48 KM. Za održavanje postojeće i izgradnju nove kanalizacione mreže planiran je iznos od 207.000,00 KM. Za rekonstrukciju i sanaciju cesta planiran je iznos od 1.413.661,02 KM što je znatno veće ulaganje nego u prethodnoj godini, dok je za zimsko i ljetno održavanje puteva planirano ukupno 270.000,00KM. Za izgradnju, sanaciju i rekonstrukciju vodovoda Budžetom su planirana sredstva u iznosu od 168.662,21 KM. Za izradu projekata i uređenje riječnih korita planirana su sredstva u iznosu od 200.000,00 KM.

### IZGRADNJA OBJEKATA, NABAVKA ZEMLJIŠTA

Budžetom za 2012.godinu planiran je nastavak izgradnje dva doma kulture na području dvije mjesne zajednice, Delijaš i Dejčići, pa su za ovu namjenu planirana sredstva u iznosu od 40.000,00 KM.

Kada je u pitanju nabavka zemljišta, planirali smo 150.000,00KM za rješavanje imovinsko-pravnih odnosa.

### POMOĆ ZA SOCIJALNO NAJUGROŽENIJE

Imajući u vidu ekonomsku krizu te da se veliki broj stanovnika nalazi u izuzetno teškoj situaciji, Općina je u ovoj godini planirala sredstva u iznosu od 30.000,00KM za jednokratne pomoći najugroženijim stanovnicima, te je oformljen fond za pomoć mladima u iznosu od 9.000,00 KM.



## PODRŠKA BORAČKOJ POPULACIJI

Općina će, kao i do sada, znatna budžetska sredstva u iznosu od 21.000,00 KM usmjeriti na podršku pripadnicima boračke populacije, za finansiranje i obilježavanje značajnih datuma iz naše novije historije.

## OBRAZOVANJE, KULTURA I SPORT

U okviru podrške obrazovnom procesu, u ovoj godini su takođe planirana sredstva za isplate stipendija studentima i srednjoškolcima sa područja Općine Trnovo u ukupnom iznosu od 36.000,00KM.

Za prevoz djece sa udaljenih područja do škole u ovoj godini su planirana sredstva od 20.000,00 KM.

Kada su u pitanju ulaganja u kulturne i sportske aktivnosti, Budžetom je planirano 12.000,00 KM za aktivnosti i iz oblasti kulture, dok je za sportske aktivnosti namjenjeno 12.000,00 KM.

Za podsticanje privrednog razvoja planirana su sredstva u iznosu od 100.000,00 KM, prvenstveno kao podrška poljoprivrednom razvoju na području Općine.

## DODJELA STIPENDIJA

Načelnik Općine Trnovo Ibro Berilo, potpisao je Ugovor o dodjeli stipendija sa 35 stipendista, od toga je 17 studenata i 18 učenika srednjih škola. Stipendije su dodjeljene za školsku 2010/2011. godinu, u iznosu od 100,00 KM za studente i 80,00 KM za učenike srednjih škola.

Uslovi koje su svi stipendisti morali ispuniti su: da imaju prebivalište na području Općine Trnovo i da nisu korisnici iz drugih izvora, a osnovni kriteriji pri izboru stipendista bili su uspjeh koji postižu u školovanju i imovinsko stanje porodica.

Dodjeljene su stipendije sljedećim učenicima:

Emir Torlak, Kerim Hamzić, Arnela Ajkunić, Ajla Pindžo, Mirsad Terzo, Almedina Omerbegović, Amir Ramić, Semira Mulalić, Elma Kolar, Selmedina Krupalija, Kenan Spahija, Edin Durmo, Edžnan Kereš, Ismeta Mulaosmanović, Dina Imamović, Kenan Bandić, Jovana Govedarica, Ena Dedić.

Studenti koji su dobili stipendije su: Nađa Dreca, Mirsad Hošić, Amina Mraković, Arnela Milišić, Emina Novalić, Almira Brkić, Dženeta Dedić, Ajla Hromo, Dženan Pločo, Emina Hošić, Kenan Dedić, Brankica Mojević, Amar Milišić, Nejra Pločo, Amra Mulaosmanović, Muhamed Drkić, Arnes Durmo.



**Ministar Abid Jusić i Općinski načelnik Ibro Berilo  
obišli postrojenje za prečišćavanje otpadnih voda u Trnovu**

Ministar prostornog uređenja i zaštite okoliša Kantona Sarajevo Abid Jusić, predstavnici Svjetske banke, KJKP "Vodovod i kanalizacija", Ministarstvo za poljoprivredu, vodoprivredu i šumarstvo FBiH, Agencije za vode oblasnog riječnog sliva Save, Unioinvesta i Općine Trnovo obišli su rekonstruisano postrojenje za prečišćavanje otpadnih voda u Trnovu kako bi se upoznali sa njegovom trenutnom funkcijom i kvalitetom obavljanja radova.

Postrojenje je rekonstruisano nepovratnim sredstvima Globalnog fonda za okoliš, putem Svjetske banke, te uz učešće Ministarstva za poljoprivredu, vodoprivredu i šumarstvo FBiH i Agencije za vode oblasnog riječnog sliva Save, a u okviru projekta ukupne vrijednosti 1.180.000,00 KM. Radove na rekonstrukciji izvodila je firma " Unioinvest" d.o.o. Sarajevo.



**Predstavnici SeeNeta-a u posjeti Općini Trnovo**

Općinu Trnovo posjetili su Gino Baral, Alessandra Neve i Daria Antenucci, predstavnici SeeNet-a. U toku posjete obišli su biciklističke staze za brdski turizam od Čakli do Sinanovića, za čiju realizaciju je regija Piemonte izdvojila sredstva u iznosu od 140.000,00 KM.

Program SeeNet je inicijativa decentralizirane saradnje Republike Italije s državama jugoistočne Evrope. Cilj programa je unaprijediti dijalog među državama, institucijama i lokalnim zajednicama u cilju efikasnog lokalnog razvoja teritorija potičući pristup gospodarskim resursima Evropske unije, matičnih država i međunarodnih fondova, te usvajanje i razvoja inovativnih programa i usluga za lokalni razvoj. Program SeeNet finansira italijansko Ministarstvo vanjskih poslova, a promovira ga Regija Toskana u partnerstvu s još pet talijanskih regija.

U trogodišnjem razdoblju, 2009.-2011., u sklopu projekta razvoj agroturizma u planinskim područjima realizovat će se uređenje biciklističkih staza za brdski biciklizam na području Općine Trnovo.





## OBILJEŽAVANJE ZNAČAJNIH DATUMA I DOGAĐAJA

### Obilježen Dan šehida

Učenjem Fatihe i Jasina, te polaganjem cvijeća i vijenaca, drugog dana Ramazanskog bajrama, na šehidskom mezarju Veliko polje na Igmanu obilježen je Dan šehida.

Cvijeće su položile delegacija šehidskih porodica Općine Trnovo i predstavnici Općine Trnovo. Prisutnima su se obratili gosp. Ibro Berilo, načelnik Općine Trnovo i gosp. Meho Terzo, ispred delegacije šehidskih porodica.

### Obilježena 19. godišnjica pogibije Keme Mehanije

U povodu 19. godišnjice pogibije rahmetli Keme Mehanije na mezarju u Turovima okupila se rodbina, prijatelji, saborci, komšije i delegacije ispred Općine Trnovo i boračkih udruženja Općine Trnovo i Kantona Sarajevo, kako bi položili cvijeće i proučili Jasin.

### Dan formiranja odreda Šabići

U okviru programa obilježavanja Dana formiranja odreda Šabići o5. juna 2011. godine Udruženje "JOB" Općine Trnovo, Općina Trnovo, Savjet MZ, porodice šehida i umrlih boraca položili su cvijeće i odali počast na mezarju u Šabićima.

### Obilježeni Dani otpora MZ Delijaš

Polaganjem cvijeća, učenjem Fatihe na mezarju u Delijašu 27. maja 2011. godine u prisustvu velikog broja rodbine, prijatelja i saboraca obilježeni su Dani otpora MZ Delijaš. Nakon obraćanja gosp. Selima Hamzića, ratnog komadanta otvoren je turnir u malom nogometu. U sklopu obilježavanja Dani otpora MZ Delijaš 29. maja 2011. godine proučen je Mevlud u džamiji Delijaš.

### Obilježen dan Diverzanata Općine Trnovo

Općinski načelnik je 6. oktobra 2011. godine upriličio prijem za porodice poginulih diverzanata. Položeno je cvijeće na spomen obilježje Igman i odata počast. Deligacija Općine Trnovo, boračkih udruženja i porodica rahmetli Mirsada Mehanića obišla je Čakle - Proskok, te položila cvijeće i odala počast na spomen obilježje poginulom diverzantu Mirsadu Mehaniću.



## AMBASADOR MOON POSJETIO OPĆINU TRNOVO

Ambasador SAD u BiH Patrik Mun i direktor USAID BiH Alan Rid posjetili su Općinu Trnovo. Vlada SAD osigurala je posredstvom USAID-a humanitarnu pomoć za najugroženije porodice na području Općine Trnovo.

Mun i Rid sastali su se sa Ibrom Berilom, općinskim načelnikom i predsjednikom Crvenog križa Općine Trnovo Mirsadom Mešićem.



### Nato štab i Ambasada Norveške donirali knjige OŠ «Zaim Kolar»

Ambasada Kraljevine Norveške i Nato štab u BiH smatraju da je obrazovanje temelj sigurnog i prosperitetnog društva. Opređeljeni su za pružanje pomoći obrazovanju mladih ljudi BiH kao pripremi za budućnost.

Kao vidljiv znak podrške mladim OŠ «Zaim Kolar» predali su knjige koje će učenicima biti dostupne u školskoj biblioteci.

Nadaju se da će im ove knjige, kao budućim odraslim ljudima i građanima Evrope, pomoći da prošire svoja znanja i shvatanja.



### Nedjelja borbe protiv TBC-a 14.-21.09.2011. godine

U povodu Nedjelje borbe protiv tuberkuloze pod motom „Zajedno u akciji protiv tuberkuloze”, Crveni križ Općine Trnovo je u saradnji sa učenicima OŠ „Zaim Kolar” i volonterima Crvenog križa Općine Trnovo izvršio:

- distribuciju propagandnog materijala pod geslom „Zajedno u akciju protiv tuberkuloze”,
- rasprodaju markica po školama i Mjesnim zajednicama,
- prikupljao podatke da li ima novooboljelih na teritoriji Općine Trnovo.





## Rezultati sa školskih takmičenja JU OŠ «Zaim Kolar»

06.12.2011. godine je održano školsko takmičenje iz engleskog jezika za učenike osmog razreda koji pohađaju nastavu po osmogodišnjem programu obrazovanja. Prema postignutim rezultatima učenik Kadir Kučuk je zauzeo prvo mjesto, Amina Čosić drugo mjesto, a Adela Godinjak treće mjesto.

09.12.2011. godine je održano školsko takmičenje iz matematike za učenike osmog razreda koji pohađaju nastavu po devetogodišnjem programu obrazovanja. Prema postignutim rezultatima učenica Edna Elezović je zauzela prvo mjesto, Nišić Elma drugo mjesto, a Krupalija Malik treće mjesto.

09.12.2011. godine je održano školsko takmičenje iz matematike za učenike osmog razreda koji pohađaju nastavu po osmogodišnjem programu obrazovanja. Prema postignutim rezultatima učenica Adela Godinjak je zauzela prvo mjesto, Kučuk Kadir drugo mjesto, a Nizama Mehanija i Čosić Amina treće mjesto.

15.12.2011. godine je održano školsko takmičenje iz njemačkog jezika za učenike osmog razreda koji pohađaju nastavu po osmogodišnjem programu obrazovanja. Prema postignutim rezultatima Adnan Pločo je zauzeo prvo mjesto sa 34,5 bodova, Kadir Kučuk drugo mjesto sa postignutih 28 bodova, treće mjesto Adela Godinjak sa postignutih 20,5 bodova.

23.12.2011. godine je održano školsko takmičenje iz geografije za učenike osmog razreda koji pohađaju nastavu po osmogodišnjem programu obrazovanja. Prema postignutim rezultatima Kadir Kučuk je zauzeo prvo mjesto sa 36 bodova, Adela Godinjak drugo mjesto sa postignutih 35 bodova, treće mjesto Haris Elezović sa postignutih 31 bod.

27.12.2011. godine je održano školsko takmičenje iz informatike za učenike osmog razreda koji pohađaju nastavu po osmogodišnjem programu obrazovanja. Prema postignutim rezultatima Adela Godinjak je zauzela prvo mjesto sa 53 bodova, Kučuk Kadir drugo mjesto sa postignutih 44 boda, treće mjesto Čosić Amina sa postignutih 41 bod.

29.12.2011. godine je održano školsko takmičenje iz fizike za učenike osmog razreda koji pohađaju nastavu po devetogodišnjem programu obrazovanja. Prema postignutim rezultatima učenica Elma Nišić je zauzela prvo mjesto, Edna Elezović drugo mjesto, a Nedim Smječanin treće mjesto.

29.12.2011. godine je održano školsko takmičenje iz matematike za učenike sedmog razreda koji pohađaju nastavu po devetogodišnjem programu obrazovanja. Prema postignutim rezultatima učenik Kerim Kučuk je zauzeo prvo mjesto, Dedić Suno drugo mjesto, a Nihad Durmo i Spiljak Muhamed dijele treće mjesto.

29.12.2011. godine je održano školsko takmičenje iz fizike za učenike osmog razreda koji pohađaju nastavu po osmogodišnjem programu obrazovanja. Prema postignutim rezultatima učenica Adela Godinjak je zauzela prvo mjesto, Haris Elezović





drugo mjesto, a Kadir Kučuk treće mjesto.

### Općinsko takmičenje

17.11. 2011. godine u centralnoj školi u Dejčićima održano je općinsko takmičenje na temu „Upozoravanje na mine“. Na takmičenju su učestvovali učenici centralne škole u Dejčićima i područne škole u Delijašu. Takmičenje je održano u saradnji sa Crvenim Križom Općine Trnovo.

Na kantonalno takmičenje plasirali su se Adela Godinjak, Elezović Haris i Kučuk Kadir. Svi su učenici osmog razreda osmogodišnjeg obrazovanja.



### Kantonalno takmičenje

XV Kantonalno takmičenje iz programa "Upozorenje na mine" održano je u subotu, 03.12.2011. godine u OŠ "Čengić Vila". Organizator ovog takmičenja je Crveni križ Kantona Sarajevo, a suorganizator takmičenja su Ministarstvo obrazovanja i nauke Kantona Sarajevo i prosvjetno pedagoški zavod Kantona Sarajevo.

Takmičenje je manifestacija koja ima za cilj da provjeri osposobljenost učenika osnovnih škola iz ove oblasti, jer stanovništvo BiH mora naučiti živjeti sa minama, a najbolji vid samozaštite je znanje o ispravnom ponašanju.

Ovom takmičenju prethodila su općinska takmičenja, a pobjedničke ekipe sa ovih takmičenja predstavljale su svoju općinu na kantonalnom takmičenju i to: OŠ "Hamdija Kreševljaković"-Stari Grad, OŠ "Safet beg Bašagić"-Centar, OŠ "Pofalići" - Novo Sarajevo, OŠ "Behudin Selmanović"-Novi Grad, Peta OŠ -Ilidža, OŠ "Mirsad Prnjavorac"-Vogošća, OŠ "Srednje" Ilijaš i OŠ "Zaim Kolar"-Trnovo.



Prema pravilniku takmičenje se sastojalo od sedam grupa zadataka, a postignuti su sljedeći rezultati:

1. mjesto-OŠ "Zaim Kolar" - OPĆINA TRNOVO  
učenici: Adela Godinjak, Elezović Haris i Kadir Kučur  
nastavnik Mumin Omerović
2. mjesto-OŠ "Safet beg Bašagić" - OPĆINA CENTAR  
učenici: Muhamed Iković, Nedžad Hadžiosmanović i Muhamed Bisić  
nastavnica: Behija Hot
3. mjesto- OŠ "Behudin Selmanović" - OPĆINA NOVI GRAD  
učenici: Tarik Jelačić, Vildana Halilović i Amina Salihović  
nastavnik: Nermin Imamović

### Federalno takmičenje

10.12.2011. godine u prostorijama Prve osnovne škole na Ilidži održano je federalno takmičenje iz programa „upozoravanje na mine „ pod pokroviteljstvom Crvenog križa Federacije BiH. Učenici su se takmičili u rješavanju zadataka vezanih za poznavanje mina i neeksplozivnih ubojnih sredstava.

Naša škola kao pobjednik kantonalnog takmičenja je uzela učešće a ovom takmičenju i osvojila treće mjesto. U takmičenju su učestvovala po tri predstavnika iz osam kantona koji su prethodno pobjedili na općinskom i kantonalnom nivou.

## REZULTATI I AKTIVNOSTI SKI KLUBA BJELAŠNICA U PROTEKLIM 9 GODINA

Skijaški Klub Bjelašnica je osnovan 18. avgusta 2003. godine i za vrlo kratko vrijeme vlastitim trudom i uz pomoć Općine Trnovo, Kantona Sarajevo i mnogih privrednih subjekata uspio je stvoriti neophodne uvjete za postizanje zapaženih rezultata i dostojno predstavljanje kluba na državnim takmičenjima kao i inostranstvu. Djevojčice i dječaci, predvođeni poštovanim vođstvom, za vrlo kratko vrijeme su izbili na sami vrh bosanskohercegovačkog skijanja.

### Postignuti rezultati:

Klub je peti put zaredom ukupni pobjednik sezone sa osvojenih 4000 bodova, ispred Željezničara sa 2524 i Ilidže 2365 bodova. Osvojene medalje u ski sezoni 2011: 22 zlatne medalje, 19 srebrnih i 11 bronzanih medalja, što ukupno iznosi 52 osvojene medalje.

U pojedinačnom plasmanu imaju dva državna prvaka u ski sezoni 2011.

- Kantardžić Ajša – državni prvak u kategoriji mlađih cicibanki
- Godinjak Belmin – državni prvak u kategoriji mlađih dječaka, koji je ujedno i najuspješniji takmičar u ovoj sezoni.

Na drugom mjestu u svojim kategorijama su se plasirali:

- Hasanbegović Salih
- Alić Esma
- Kazazović Senad

Treće mjesto u svojoj kategoriji zauzeo je:

- Hasanbegović Mirza

Pored ovih takmičarskih uspjeha Ski klub Bjelašnica se u proteklih devet godina pokazao i kao izvrstan organizator. Organizacija "Kupa Srebrna lisica" je prepoznatljiv po tehnički sjajno organizovanom takmičenju već punih sedam godina, što je krunisano sa organizacijom međunarodne Fis slalom trke u alpskim disciplinama kao i tehnička organizacija veleslalom trke na 51. Svjetskom vojnom prvenstvu u alpskim disciplinama koje je voženo na Bjelašnici.

Ski klub Bjelašnica je proteklih godina organizovao i školu skijanja kroz koju je prošlo oko 2000 djece različitih dobi i uzrasta.

Ski klub Bjelašnica je organizovao veliki broj biciklističkih tura sa svojim članovima, prijateljima i simpatizerima na prostoru Općine Trnovo što uključuje i prvu diplomatsku brdsko-biciklističku vožnju po Igmanu i Bjelašnici a sve u cilju promoviranja turističkih potencijala ovih planina i Općine Trnovo.

Planinarski pohod na Treskavicu u čast Zaima Imamovića, komandanta 14. Divizije Prvog korpusa AR BiH

Kamp i zimovanje sa školom skijanja za djecu pripadnika Armije RBiH koja je organizovana u Šabićima.

Projekat "Obilježavanje biciklističkih staza na olimpijskim planinama Igmanu i Bjelašnici" u saradnji sa Općinom Trnovo, Općinom Ilidža, Općinom Hadžići i Direkcijom za ceste Kantona Sarajevo.

Ski klub Bjelašnica se dokazao i u vanskijaškim aktivnostima. Članovi Ski kluba Bjelašnica učestvuju već sedam godina u biciklističkom maratonu Bihać - Srebrenica. Maraton se vozi u čast obilježavanja i sjećanja na Srebreničke žrtve genocida 12. jula svake godine. Maraton je međunarodnog karaktera, vozi se tri dana i pređe se oko 500 km.

